



Atvinnuvega- og nýsköpunarráðuneyti  
Skúlagötu 4  
101 Reykjavík

*Sent inn á Samráðsgátt*

Reykjavík, 15. apríl 2020

**Efni: Umsögn SI um frumvarp til laga um viðskiptaleyndarmál, mál nr. 75/2020.**

Samtök iðnaðarins (hér eftir „SI“ eða „samtökin“) vísa hér til máls nr. 75/2020, sem birt var á samráðsgátt Stjórnarráðsins þann 17. mars s.l. Þar eru kynnt til umsagnar drög að frumvarpi til laga um viðskiptaleyndarmál.

Með frumvarpinu er verið að innleiða tilskipun Evrópuþingsins og ráðsins 2016/943/ESB frá 8. júní 2016 um verndun trúnaðarupplýsinga um sérþekkingu og viðskipti (viðskiptaleyndarmál) gegn ólögmætri öflun, notkun og birtingu þeirra. Markmið lagasetningarinnar er annars vegar að tryggja að kröfur tilskipunarinnar séu uppfylltar í íslenskum rétti og hins vegar að styrkja réttarvernd viðskiptaleyndarmála og gera handhöfum þeirra auðveldara að leita réttar síns.

Samtökin fagna því að verið sé að auka vernd gegn ólögmætri öflun, notkun og afhjúpun viðskiptaleyndarmála. Skýr réttarstaða í þessum málefnum eykur trú og eflir samkeppnishæfni íslensks markaðar á sviði nýsköpunar, rannsókna og hugverka. SI gerir ekki athugasemd við einstaka lagagreinar frumvarpsins. Samtökin vilja aftur á móti að með frumvarpinu verði tryggt að trúnaðarupplýsingar sem eru lagðar fram í opinberum innkaupum öðlist sömu vernd og viðskiptaleyndarmál.

Í 17. gr. laga um opinber innkaup, nr. 120/2016, er kveðið á um trúnaðarskyldu, en þar segir að kaupanda er óheimilt að láta af hendi viðkvæmar upplýsingar sem fyrirtæki hefur lagt fram sem trúnaðarupplýsingar. Til slíkra upplýsinga teljast upplýsingar um rekstur, sértækar tæknilausnir, einingarverð, fjárhagsmálefni og viðskipti og aðrar þær upplýsingar sem skaðað geta hagsmuni fyrirtækisins ef aðgangur er veittur að þeim. Þrátt fyrir skýrt ákvæði þá er hættu á að hið opinbera veiti öðrum en þeim sem ráða yfir upplýsingum með lögmætum hætti aðgang að viðkvæmum trúnaðarupplýsingum, sbr. 17. gr. laganna. Það getur m.a. gerst ef almenningur fær aðgang að útboðsgögnum á grundvelli upplýsingalaga, þar sem viðkvæmar upplýsingar eins og einingarverð eða sértækar tæknilausnir eru aðgengilegar.

Til að tryggja aukna vernd ofangreindra trúnaðarupplýsinga leggur SI til að bætt verði við 20. gr. frumvarpsins breytingar á lögum um opinber innkaup, nr. 120/2016. Samtökin telja að 1. mgr. 17. gr. laganna skuli vera breytt með því að bæta við nýjum málslíð sem áréttar að við öflun, notkun og afhjúpun á fyrrgreindum trúnaðarupplýsingum gildi lög um viðskiptaleyndarmál. Téð viðbót við frumvarpið tryggir bjóðendum í opinberum innkaupum þau úrræði sem frumvarpið hefur að geyma, t.a.m. heimild til að leggja lögbann, bætur fyrir fjártjón og/eða bætur fyrir ófjárhagslegt tjón. SI hvetur stjórnvöld til þess að endurskoða frumvarpsdrögin með hliðsjón af ofangreindri athugasemd.



Samtökin vilja að lokum leggja áherslu á það, verði frumvarpið að lögum, að þagnarskylda hins opinbera sé höfð í öndvegi þegar einstaklingar og lögaðilar afhenda því viðskiptaleyndarmál. Komi til þess að eftirlitsskýrslur eða aðrar upplýsingar séu birtar, skulu stjórnvöld ávallt sjá til þess að viðskiptaleyndarmál séu undanskilin þeim birtingum, enda geta þess konar upplýsingar ekki átt við almenning nema skilyrði 3. gr. frumvarpsins eru sannarlega uppfyllt. Ennfremur leggja samtökin áherslu á að eftirlitsaðilar gæti meðalhófs í eftirliti sínu og taki ekki afrit af viðskiptaleyndarmálum, t.d. uppskriftum, nema brýn þörf sé á.

SI áskilur sér rétt til að koma á framfæri frekari athugasemdum á síðar stigum og lýsa sig jafnframt reiðubúin til að funda með ráðuneytinu um málið, sé þess óskað.

A handwritten signature in black ink that reads 'Björg Ásta Þórðardóttir'.

---

Björg Ásta Þórðardóttir  
lögmaður SI